

Siunnersuut uunga: Kalaallit Nunatta pigisaannik aningaaserivimmik pilersitsinerup iluaqtissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piunasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut

(Inatsisartunut ilaasortamit Anthon Frederiksenimit, Partii Naleraq, saqqummiunneqartoq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Jens Immanuelson, Siumut, siulittaasoq

Inatsisartunut ilaasortaq Randi V. Evaldsen, Demokraatit, siulittaasup tullia

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Bendt Kristiansen, Inuit Ataqatigiit

Inatsisartunut ilaasortaq Martha Lund Olsen, Siumut

Inatsisartunut ilaasortaq Ineqi Kielsen, Siumut

Inatsisartunut ilaasortaq Kelly Berthelsen, Inuit Ataqatigiit

Ulloq 19. oktober 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuuteqartoq isumaqarpoq nuna namminiilivikkusuttoq aningaaseriveqarnikkut immi-nut sullinnissaminik qulakkeerinnittariaqartoq. Taamaattumillu misissuinissap siuliani taane-qartup ingerlannissaanut Naalakkersuisut peqquneqarnissaat siunnersuutigineqarpoq. Siun-nersuuteqartup siunnersuuteqarnermini siunertaraa Namminersorlutik Oqartussat pigisaannik aningaaserivimmik pilersitsinissaq siunertaralugu paasissutissanik tunngaveqarluni tamatuma kingorna oqallittoqarnissaa.

2. Siunnersuutip Inatsisartunit siullermeerneqarnera

Siunnersuut siullermeerneqarami amerlanerussuteqartunit taperseerneqarpoq, ikinnerussuteqartulli tamakkiisumik kalaallinit pigineqartumik aningaaserivimmik pilersitsinissamut aporfissaqartoq takuneqarsinnaanngimmat siunnersuutip itigartinneqarnissaa inassutigaa. Siunnersuut aappassaaneerneqartinnani Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

3. Ataatsimiititaliap siunnersuummik suliarinninnera

Siunnersuutip kalaallisoortaa danskisuuvalu imminnut naapertuutivinngitsut ataatsimiititaliamit maluginiarneqarpoq. Aningaaserivimmik "Kalaallit Nunatta pigisaanik" pilersitsinerup iluaqutissartaasa aporfissarisinnaasaasalu misissorneqarnissaat siunnersuuteqartup kalaallisoortaa kissaatigaa. Siunnersuuteqartup tamanna qanoq isumaqartinneraa siunnersuummi nasuiarneqanngilaq, tunngavilersuummili allassimalluni Kalaallit Nunaanni maanna aningaaseriviusut kalaallinit pigineqanngitsut.

Taasissutissap danskisuuani aningaaserivik "kalaallinit pigineqartoq" atorineqarpoq, tunngavilersuummili toqqaannaq taaneqarluni aningaaserivik Namminersorlutik Oqartussanit pigineqassasoq.

Siunnersuutip akuersissutigineqarnissaa Naalakkersuisut inassutigalugulu pissutsinik attuumassuteqartunik tamanik imaqtartumik nassuiaasiornissartik piareersimaffigigaat ataatsimiititaliamit maluginiarneqarpoq. Kalaallit Nunaanni aningaaseriveqarneq pillugu nassuiaat 2008-meersoq Naalakkersuisut akissuteqaamminni innersuussutigaa. Inatsisartut ataatsimiititaliaata susasaqartup nassuiaat tunngavigalugu qulequttat suut nassuiaammi nutarterneqartussami ilaatinneqassanersut nalilissagaa Naalakkersuisut siunnersuutigaa.

Naalakkersuisut apeqqusiinertaqanngitsumik siunnersuummut akuersaarlutik inassuteqarnerat pissutigalugu qulequttat immikkut ittut sordiaat nassuiaammi nutarterneqartumi paasinarsisineqassanersut ataatsimiititaliamit tikkuaavigineqassanngilaq, tassa nassuiaatip pissutsinik attuumassuteqartunik tamanik imaqarnissaanik Naalakkersuisut kissaateqarnerat taamaaliornikkut killilerneqarsinnaasutut ataatsimiititaliamit nalilerneqarmat.

Taamaakkaluartoq ataatsimiititaliamit oqaatigiumaneqarpoq 2008-mi nassuiaateqaqqaarnerup kingorna aningaasalersuineramik ingerlatsineq pillugu inatsisit allannguutaat tamarmiusut nassuiaammi misissorneqarlutillu isummerfigineqartariaqartut, tamannalu aallaavigalugu aningaaserivimmik ingerlatsinermi aningaasaateqarnissamik, pisussaaffeqarnikkut nakkutilliinikkullu piumasagaatit suunersut immikkut naliliiffigineqarluni.

Tamatuma saniatigut kalaallit aningaasaliinissannut sulisoqarnermullu tunngatillugu aningaaserivimmik pilersitsinerup piumasagaatitariumaagaasa misissorneqarnissaannik siunnersuuteqartup kissaateqarnera ataatsimiititaliamit eqqumaffigeqquneqassaaq. Kiisalu siunnersuutip siullermeerneqarnerani oqaatigineqarpoq kalaallit pigisaannik aningaaseriveqarnikkut Kalaallit Nunaanni aningaasat annissorneqartut killilersimaarneqarsinnaasut, tassungalu ilanngullugu aningaasat sapinngisamik Kalaallit Nunaanni kaaviiarnissaannut peqataaqataasinnaasoq.

Siunissami aningaasaqarnerup imminut napatilersinnaaneranut tamanna siuarsaaqataasinnaasutut naatsorsuutigineqarpoq.

Ingerlatseqatigiiffiup kalaallinit pigineqarnissaata qulakkeerneqarnissaanut periarfissaq tasaaavoq aningaaserivimmik taamaattumik Namminersorlutik Oqartussat pilersitsinissaat tamatumani aallarniutitut aningaasaliissutaasussanik tamakkiisunik aningaasaliissuteqarnissaat. Tassunga atatillugu apeqqutit makku nassuiaammi sammineqarsinnaapput:

- Aningaaserivimmik pisortanit pigineqartumik Namminersorlutik Oqartussat pilersitsinissaat Naalakkersuisunit qanoq isumaqarfigineqarpa?
- Namminersorlutik Oqartussat aningaaserivimmik piginnittuunissaanni suut pitsaaqutaallutillu ajoqutaassappat?
- Taamatut aaqqissuussineq ingerlaavartumik aningaasalersuiffiusariaqanngitsumik pilersinneqarsinnaava aammalu tamanna assersuutigalugu isumaginnittoqarfimmu peqqinnissaqarfimmullu aningaasalersuinissamut periarfissaqarnermut qanoq sunniuteqasava?

Illuatungaatigulli aningaaserivimmu Namminersorlutik Oqartussanit pigineqartumut taarsiunneqarsinnaavoq kalaallit aningaaseriviat namminersortunit tamakkiisumik pigineqartoq, tamatumani iluanaarutinit allanillu piginnittunut tunniussinerit kalaallinut piginnittunut kisimik tunniunneqartarlutik.

Tamatumunnga Naalakkersuisut qanoq periarfissaqarsoraat?

4. Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisai pillugit Aningaasaqarnermut Akileraartarnermullu Ataatsimiititaliaq annertunerusumik oqaaseqaatissaqanngilaq.

5. Ataatsimiititaliap inassuteqaatai

Ataatsimiititaliami amerlanersuteqartut Siumup Inuit Ataqtigiillu ilaasortaataasa siunnersuut akuerineqassasoq inassutigaat.

Ataatsimiititaliami ikinnerussuteqartoq Demokraatit ilaasortaataat siunnersuut pillugu ima oqaaseqaateqassaaq:

“Demokraatini siusinnerusukku oqaatigereerparput - aamma oqaatigeqqikuttoorsinnaavarput. Namminersorlutik Oqartussat suliffimmik ingerlatsissanngillat aningaaserivugaluarpalluunniit. Isumaqarpugut innuttaasut namminneq aalajangertariaqaraat sorleq aningaaserivittut atorusunnerlugu.

Maannakkut aningaaseriviusut suliainnut immikkut ilisimasaqartuupput. Namminersorlutik Oqartussat immikkut ilisimasaliunngillat. Namminersorlutik Oqartussat aningaaserivimmik ingerlatsileriaataassagaluarpata taava pisortat allaffissornerat alleriaannassaaq aamma sulilerumaartussat qularnanngitsumik avataaneersuusariaqassapput, uangut nammineq inatsisilerituumik, immikkut aningaasarsiornermut ilisimasalinnik il.il. nunami maani amingateqaratta.

Imaangilarli sulisartut nunani allaneersut ajorigatsigit - tikilluaqqukuttoorpagut aamma pisariaqarput - kisianni oqaatiginiaannarlugu, siunnersuuteqartup partiiata politikikkut anguniagaanut akerliulluinnarmat nunani allaniik sulisussanik tikisitsisarnissaq. Ataqatigiinngilluinnarput.

Namminersorlutik Oqartussat aningaaserivimmik ingerlatsileriataassagaluarpata taava pisortat allaffissornerat ingalluni allissaaq aamma nalunngilara aningaaserivimmi sulilerumaartussat tikisitaajumaartut, nunami maani amingaatigigatsigit inatsisilerituut, aningaasarsiornermut immikkut ilisimasallit il.il. Imaangilaq tikisitat ajorigatsigit - tikilluaqqunartaqaat pisariaqarlutillumi - oqaatiginialaaginnarlugu siunnersuuteqartup partiiata tunngaviummik anguniangarimmaga tikisitanik sulisusarsiniartoqartassanngitsoq.


Ataqatigiinngillat. Kissaatigaarput inuit namminneq kiffaanngissuseqarlutik aningaaserissaminnik toqqaasinnaassasut aamma politikikkut aalajangersarneqassanngilaq innuttaasut aningaaserivinnik sorlernik atuissanersut.

Taamatulli oqareerluta aamma pingaaruteqarpoq eqqaassallugu Partii Naleqqap nammineq imaluunniit allat kalaallinik taamaallaat pigineqartumik aningaaserivimmik ammaanissaat ajornanngimmat. Taamaaliorusukkussi takannarujussuaq. Inuinnaalli aningaasaataat atortariaqarput aamma aningaaseriviit pioreersut unammillerlugit.






Taamatut tunngavilersuuteqarluta inassutigaarput siunnersuut itigartinneqassasoq.”

Tamanna tunngavigalugu siunnersuut itigartinneqassasoq **ataatsimiititaliami ikinnerussuteqartup Demokraatit ilaasortaataata** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Jens Immanuel, siulittaasoq


For Randi V. Evaldsen
Peter Olsen
Bendt B. Kristiansen
Martha Lund Olsen
Ineqi Kielsen
Kelly Berthelsen